



Minggu, 07 Januari 2024
Ogen: Miha 3:8-12



Pang Nuriken Kebujuren



Kena dung kebaktin Minggu sisalamen me Pandita ras perpulungen, rempet sekalak anak perana marap kurum kemuhen pandita ndai. Sengget pandita, tapi minter ingetna khotbahna ndai, *"adi parap kalak kurumndu si kemuhen, bereken kurumndu si kawes."* E maka berekenna ka kurumna si kawes. Idah anak perana ndai labo merawa pandita janah berena ka kurumna si kawes, mis parap anak perana ndai. Dua kali, kawes ras kemuhen. La ndekahsa, mis parap pandita e anak perana ndai. Anak perana e merawa, *"uga kam e pandita? Engkai maka parapndu aku? La kepe sue ras khotbahndu ndai."* Nina pandita, *"payo tuhu maka lit Kata Dibata kerna si e. Tapi me la lit Kata Dibata si ngatakensa uga ras kai silakoken selanjutna adi nggo iparap kurum kemuhen ras kawes ta enda. E maka, kubalastah alu marap kurumndu."* Aminna pe enda terjeng cerita, tapi megati kal si jumpa i bas kegeluhenta teptep wari maka kita sedar pengerana ras perbahanen e la rusur sendalanan. Ninta, *"aku enda pengikut Kristus"* tapi kegeluhennta la nuduhkan "biak Kristus." Mikha mandang kerna pemimpin, imam ras nabi si la sendalanan i bas tugas-tanggung jabapna ras kinata kegeluhen si lit. Pemimpin e terjeng ngelai dirina jine, ngaloken duit subuk arah sogok ntah iupahi, nindih kalak si lemah ras la erbahan keadilan. Mikha tetap setia nandangi pendilo Dibata. Pang nuriken kebenaran aminna pe la ngena ate kalak sideban. E maka inubuatken Mikha maka kerina nabi ipermelaken Dibata, kerina pemimpin ntah penguasa ras imam-imam pe kena rawa Dibata maka kedungenna Jerusalem ras Rumah Pertoton iruntuhken Dibata. Asum kesempatan jadi pemimpin ntah jadi si erdahin Tuhan lit, maka pakeken alu mehuli guna ngelai jelma si enterem, guna nuriken kebenaran si arus idalanken kerina jelma bage pe mperjuangkan keadilan. Alu bage tuhu-tuhu sendalanan kai pendahin ras kai si arus idahiken.

➤ biak Kristus teridah min bas lagu langkah